



ル 5
326
6



門ル呂5
詩 326
卷 6

名山巖洞泉石古蹟卷之四上

吳興歸安山泉慎蒙編選

銀梓校正

浙江

杭州府

吳山

在府治東南吳人憐子胥以諫死立祠其上

又名胥山上有寺觀左臨大江右瞰西湖為一郡勝槩

瑞石山

在府治南北接吳山下有

紫雲洞元薩天錫詩○

飄飄雲氣穿石屋石上

名山記

卷之四上

一百八十三

涼風吹紫竹掛冠何日賦歸來煮石篝燈洞中宿
寶山 在府治南吳山之西宋蘇軾同秦仲二子雨
中游寶山詩○平明已報百吏散半日來陪二子閒
立鶴低昂烟雨裏行人出沒樹林間

鳳凰山 在府治南二里下俯大江直望海門山勢
若鳳凰欲飛之狀本朝徐賁詩○荒山欲逐鳳凰騫
誰構浮圖壓寢園土厚尚封南渡骨月明不照北歸
魂海門有路雙龍去沙渚無潮萬馬屯莫向秋風重
惆悵梵王宮殿易黃昏

南屏山 在府城西二里惟石聳秀中穿一洞其上

石壁若屏

孤山 在府城外西湖上獨立一峰爲湖山勝絕處
上有林逋祠唐張祐詩○樓臺聳碧岑一徑入湖心
不雨山長潤無雲水自陰斷橋荒蘚合空院落花深
猶憶西窓夜鍾聲出北林

秦望山 在府城南一十里輿地志秦始皇東游登
此欲渡會稽故名吳越史唐咸通中望氣者言錢唐
有王氣命侍御史許渾等賫璧瘞此山以厭之山東
南有羅剎石橫截江濤唐白居易○嵌空石面名羅
剎壓捺湖頭敵子胥

名山記 卷之四 二
五雲山 在府城西南二十五里上有真際院院有井大旱不竭

桐扣山 在府城東北五十里下有石鼓胡晉武帝時岸崩出一石鼓扣之無聲張華取蜀桐木刻魚形扣之聲聞數里故名

西巖山 在富陽縣北三十里巖下有洞洞口有池早晚與潮應山麓有石扣之鏗然人號石鼓世傳葛仙翁煉丹於此唐白居易○巖前寶磬傳松韻洞口靈池應海潮

安樂山 在餘杭縣東二里相傳吳越王錢氏之子

嘗於此築菴養疾而愈故名

大滌山 在餘杭縣西南一十八里中有日月分精金堂玉室人謂此山清幽可洗滌塵心故名大滌其中峰曰白鹿山上有許邁升天壇丹竈遺跡及大滌棲真石室白茆歸雲鳴鈴龍蛻諸洞有來賢巖有仙跡巖下有九瑱山縈紆凡九折曰天關曰藏雲曰飛鸞曰凌虛曰通真曰龍吟曰洞微曰雲璈曰朝元有撫掌翠蛟桃花飛瀑諸泉今洞霄宮在焉宋林景熙詩○肥馬輕裘到此難名標九鎖翠微間天開洞府幾千載地隔風塵此一關謝屐空憐迷鴈蕩蘇詩不

是夢廬山。他生修得清緣在。擬扣金堂覓大還。

洞酌○在青檀山。越小石門有泉一綫。水自石罅出。注石穴。穴狀如仰盂而方。曰洞酌。

月窟○洞酌之旁有巨石圓竅玲瓏。廣二尺許。深五六尺許。曰月窟。

冰壺○月窟之西有石竇貯泉甚寒而甘。曰冰壺。湧翠石壁○自試劍岩復二十餘步有峭壁面北。從地湧起高可一二丈。廣二三十丈。其上蒼翠玲瓏奇。惟萬狀莫可形容。蓋茲山秀氣發自來賢至此。餘半里始盡呈露。上有石乳焚之芳香。有岩對

峙相去僅數尺。不容並行。若以人力開闢。尚可作亭。盡意觀覽爾。今外向有亭。曰翠微。

伏虎岩○在宮山西南峻壁間。若環堵之室。南有路自上而下。復陟厓磴。方至其所。藤蘿深密。怪禽晝啼。非有道之士不可處也。昔郭真君伏虎於此。按晉書云。葛洪何幼道偕訪之。目擊而已。各無所言。引嘯而退。

仙跡岩○去宮一里。在行路隔溪厓石上。按記云。秦始皇驅山岳。擬塞東溟。嘗役鬼移之。山勢欲動。忽有仙人叱鬼。以身扼厓石。使不得去。今厓上有

肩帔簪冠隱然遺跡溫潤光澤苔蘚不生以手摩
拭良久作古桂香云楊傑○祖龍求仙徒用力駕
海欲驅山下石神人倚佳不與行留得岩前隱仙
跡。

石香鼎○宋學士陳公堯佐授外臺日謂道士馮
德之曰嘗夢游名山見仙人以鼎鼎相期何敢過
望馮曰學士人望所歸名列仙籍世間官爵何足
相免後果大用造紫石巨鼎二置祥光亭上其一
銘○爐之質剏中起煙人之體虚心養元不用之
用自然而然爐兮人兮茲謂道焉其二銘○山之

高兮巉巖出雲洞之深兮幽幽宅真鸞鶴一瞬鳧
鷺百春安得而往葆光晉神其一又云

大滌洞○在宮西北半里茅君傳云第三十四洞
天名大滌玄蓋之天周回四百里內有日月分精
金堂玉室仙官校災福之所姜真人主之與華陽
林屋遂道暗通相傳玄洞先生入游見龍麟異境
花木鮮繁自華陽而歸洞門石鼓廣可尋丈扣之
蓬蓬有聲自此上下皆平如剗削兩旁厓石委曲
夾道中間一石若柱倒懸因以隔凡名之過柱一
穴如竇內濶丈餘中有圓井無底惟聞琅琅水聲

乃歷代朝廷遣使接龍壁之處也常有白鼠長
二尺許游於高厓厓上產草名玉芝餌之長生今
洞中石潤如玉作蒼黑色行路屈折僅通人至隔
凡而止

棲真洞○在大滌山前西天柱嶺上去宮三里一
名西洞舊志云大滌先生杜琛語弟子何法仁曰
汝宜居西洞可以避世成真遂名棲真洞天生恩
頂狀若寶蓋龕室幽深乳泉滴瀝又東西二臺石
厓上有龍瓜蟠拏蹴踘之跡或戲以手漫滅翌日
視驗如初是知洞龍出入之逕也西臺一石平如

棋局白石子如拳委積其上旁列石坐環向焉入
洞門三丈許有石仙人為仰卧狀又越華蓋西有
石龕可容數人宋大觀三年山人胡真隱居之一
日忽聞有聲若鼉鼓數百黑雲變隼間火毬相逐
奔出洞口已而迅雷烈風震撼山谷移時乃止昔
陳堯佐詩○二天封部稼如雲流水清寒出洞門
更愛林間盤石上松花吹散羽人樽

石室洞○一名藏書一名東玲瓏在大滌山中峰
前白鹿山下洞中三穴若品字透見天日門有石
梁橫界泉脉涓涓注石梁下引而瀦之可供千餘

人居者賴之相傳郭真君登山採藥嘗濯于此名
洗藥泉郡志云吳天師筠修煉之所天師既尸解
於宣城指令門人藏書劍於此洞有石室故以名
之○景行錄載天師云當遷神于天柱石室蓋太
上俾我煉蛻之處故卜其西麓果有石坐岩扉自
然咸備如是則不惟書劍亦天師藏真焉按石精
金光經言曲晨飛精藏景錄神劍解之道凡暫過
太陰紫胞煉度皆四百年所藏必發蓋數足運會
其靈自有以發之耳白茅洞○在宮山西南十里
嶺石靈迹巋然按記云晉人遇一道士衣巾爽麗

自洞中出詢所自來曰吾白茅先生職此久矣因
名之其門如井縋縋而下一二丈至平地即回環
容坐二十人復偃身下入約又二丈許則有仙人
酒瓮石及石柱二一竅上徹天光境界奇絕

鳴鳳洞○在宮外一里道旁山上雖石門阻隘有
童稚可入云其間廣埽兩屋旁一小路不知所極
上有穴泉流爲丁當音下入方池未嘗減溢

蛻龍洞○在鳴鳳洞相對山厓中相去百步許喬
木幽隱岩穴嵌巉深可數丈宋皇祐初羽人於洞
間獲龍蛻骨齒角皆具故名春夏多蛇虺出入似

欲回俗上駕者記云五洞潛通此其一也

歸雲洞○去宮五里在棲真洞左偏半里許即棲真之後門深可百餘尺石壁光瑩洞有愚頂亞於前洞按記云是神仙回車之便道故曰歸雲常有雲氣往還于洞外洞門狹僅數尺下入丈許石皆如瑪瑙五色紋聖如旋雲飛霞直下方池深不盈尺廣可二尺長可三尺池底白色如累珠鏤玉可愛泉水則盈涸不常又下十數步有白石若瓠者三又下數步左偏上陟則有石盆其上流泉涓涓下入盆內可以盥四周石乳如垂瓔珞復返右偏

直下十四五步濶二丈許其中有石如積銅錢者周圍平坦容三十餘人

宿洞霄宮林逋詩○大滌山相向華陽路暗通風霜唐碣朽草木漢祠空劍石苔花碧丹池水氣紅幽人天柱側茅屋洒松風又○秋山不可畫秋思亦無垠碧澗流紅葉青林點白雲涼陰一鳥下落日亂蟬分此夜芭蕉雨何人枕上聞

右二詩不見先生集中乃得真蹟於先生七世孫可山林君洪處嗚呼先生高才清節照映千古此詩又其用意之作幾至流落甚可歎也

九鎖山 天閔鎖藏雲鎖飛鸞鎖凌虛鎖通真鎖龍吟鎖洞微鎖雲蒸鎖朝元鎖 天柱山 餘杭縣西南一十八里四隅陡絕聳翠參天為道家第五十七福地記云天柱在中國者有三一在壽陽一在龍舒此其一也

衣錦山 在臨安縣治南本名石鏡山東峰有圓石徑二尺七寸其光如鏡錢鏐幼時游此顧其形服皆冠冕如王者狀其後唐昭宗改鏐所居營為錦衣營又升為衣錦城并封此山為衣錦山鏐宴故老山林皆覆以錦號其幼時所戲木曰衣錦將軍宋蘇軾賦

將軍木○阿堅澤畔菰蒲節玄德墻頭羽葆桑不會世間閒草木與人何事管興亡

九仙山 在臨安縣西一十二里相傳葛洪許邁煉丹之地蘇軾詩○風波王謝古仙真一去空山五百春玉室金堂餘漢土桃花流水失秦人醉眠一榻香凝帳夢遶千崖冷逼身夜半老僧呼客起雲峰缺處涌冰輪自注九仙謂左元放許邁王詡之流

天目山 在臨安縣西五十里高三千九百丈周八百里亘杭宣湖徽四州道書謂此為第三十四洞天元和志云天目有兩峯峯頂各一池左右相對如目

左屬臨安右屬於潛東西二瀑布瀆注爲池名蛟龍池又有上中下三池池上有潭如仰箕曰箕潭箕潭溢而入者曰上池懸崖五十仞上有石壁如門其環流而下者曰中池垂崖三十餘仞噴湧如雷懸流而下注者曰下池其深莫測

徑山 天目之東北峰有路可通天目故名徑山五峰周抱奇勝特異

岸崑山 在於潛縣西二里峭聳清絕下浸碧溪旁環翠岫遙望天目爲醒心豁目傑特之觀

千頃山 在昌化縣西北六十里上廣千頃宋參寥

子有茲山差我冠天半之句山有龍湫魚皆金銀色禱雨多應西有莎蘿花一株初夏花開香聞數里又新城縣西北六十里亦有千頃山相傳爲許由故居有許由洗耳灘巢父飲牛灘

大鵠頭山 在昌化縣西北六十里或以爲山類鵠頭或以爲鵠棲其上故以名山勢上凌霄漢上有龍池濶三百畝傍有葑田歲旱鄉人攀緣禱雨

南高峯 在府城西一十二里上有古塔下有石屋杭都賦南北高峰獨秀群嶺之表

北高峰 在府城西北二十三里上有塔高七層

天竺峰 在府城西一十七里九域志天竺山葛仙翁得道之所

飛來峰 在府城西二十里晏殊地志晉咸和中西天僧慧理登此山歎曰此是中天竺國靈鷲山之小嶺不知何年飛來因號其峯曰飛來一曰鷲嶺宋王安石詩飛來山上千尋塔聞說鷄鳴見日升不畏浮雲遮望眼自緣身在最高層

萬松嶺 在府城南夾道栽松唐白居易詩萬株松樹青山上十里沙隄明月中高則誠詩○莫向中原嘆黍離英雄生死係安危內庭忽下班師詔絕漠全

收大將旗父子一門其伏節山河萬里竟分支孤臣尚有埋身地二帝游魂更可悲

慈雲嶺嶺之南曰龍山一名卧龍山有登雲臺環珠泉宋籍田郊壇高禩壇遺址在焉

青衣洞 在吳山上三茅觀後相傳昔人行至洞口有青衣童子逐之不見但聞風雨聲毛髮悚慄而出

水樂洞 蘇子瞻倅郡有詩刺之○詩曰君不學白公引涇渭五斗黃泥一鍾水又不學哥舒橫行西海頭歸來羯鼓打梁州但向空山石壁下愛此有聲無用之清流流泉無絃石無竅強名水樂人人笑慣見

山僧已厭聽多情。海月空留照。聞道磬裏東入海。遺聲澗谷含宮徵。聲奏未成君獨喜。不須寫入薰風絃。縱有此聲無此耳。

呼猿洞 在武林山宋僧遵式白猿峰詩序云西天僧慧理畜白猿於靈隱寺月明長嘯清音滿室

煙霞洞 在府城南一十六里洞中舊有石刻羅漢六吳越王別刻十二共成十八羅漢至今猶存

西湖 在府城西周回三十里其源出於武林泉山川秀發景物華麗自唐以來為東南游賞勝處舊稱西湖有十景曰平湖秋月蘇隄春曉斷橋殘雪雷峯

落照南屏晚鍾麴院風荷花港觀魚柳浪聞鶯三潭印月兩峰插雲至今湖中四時邦人士女嬉游歌鼓之聲不絕宋林逋詩○春水淨於僧眼碧晚山濃似佛頭青

參寥泉 在西湖智果寺泉甘冷宜瀹茗蘇軾在黃州時夢參寥子賦詩覺而記兩句云寒食清明都過了石泉槐火一時新後七年守錢塘而參寥子已居智果院軾於寒食之明日泛湖謁參寥子汲泉鑽火烹黃蘗茶忽悟所夢詩作應夢記。

六一泉 在孤山之趾蘇軾名泉并序其事

古蹟

拱北樓 趙子昂詩○提疆內向三千里比屋同封
百萬家舉頭便覺長安近時倚闌干望日華

有美堂 在鳳凰山下宋梅摯守杭時建以仁宗賜
詩有地有湖山美之句因取有美名堂歐陽修記曰
有美堂者山水登臨之美人物邑居之繁一寓目而
盡得之蓋錢塘兼有天下之美而斯堂者又盡得錢
塘之美焉宜乎公之甚愛而難忘也

過溪亭 在風篁嶺宋僧辨才退居龍井不復出入
蘇軾訪之辨才送至嶺上左右驚曰遠公復過虎溪
矣因作亭名過溪

翠微亭 在飛來峯上宋秦檜主和韓世忠抗疏言
其誤國因乞解樞密柄遂奉朝請杜門謝客口不言
兵時跨驢携酒從一二奚童縱游西湖以自樂因建
此亭

勝果寺 在鳳凰山右由寺而西半路有石如躍雲
狀山之上有地如坡名爲御教場諸石森列如排衙
名曰排衙石有月岩兩石夾持形圓如月故名復上
南登其巔則天宮之宮殿峻嶺奇石巉巖一望在目
且宋之祭田真如指掌陽明○所謂龜疇見宋田者

此也此亦南山之最勝

慶忌塔 在昭慶寺北慶忌者吳王僚之子也闔閭
弑僚慶忌奔衛闔閭患之謀諸伍員員進細人要離
俾之行刺要離者細而寡力迎風則僵負風則伏王
語以慶忌之勇謂其不如也要離曰臣能殺之乃詐
以得罪如衛勸慶忌伐吳渡江要離坐於上風因風
之勢以矛鈎其冠順風而刺慶忌死葬於此

湖州府

峴山 在府城南五里本名顯山晉太守殷康建亭
於上名顯亭唐改曰峴山

浮玉山 在府城南七里玉湖中巨石如積坡陀硯
礪不以水盈縮為高卑故名此山之南兩小峰參差
曰上下釣魚山元趙孟頫詩○玉湖流水清且閑中
有浮玉之名山千帆過盡暮天碧惟見白雲時往還
道場山 在府城南一十二里唐時有僧寓此因名
道場宋蘇軾詩道場山頂何山麓汪藻云游道場山
者如入王侯之家過何山者如造高人隱士之居
卜山 在府城北一十八里高六千丈非晴天爽月
不見其頂山有似玉之石因名亦名弁山其下有玲
瓏山石皆嵌空元趙孟頫詩○出郭聞鶯語穿林散

馬啼礪松何鬱鬱春草又萋萋白石那堪煮丹崖尚
可梯平生愛高興只合此幽棲

西塞山 在府城西二十五里唐張志和詩西塞山
邊白鷺飛桃花流水鱖魚肥

烏瞻山 在長興縣北五十里宋邵緝○白墮每孤
青夜月烏瞻還對舊時山昔有烏子瞻望此山上曰
可以避難養道為隱者所居故名

計籌山 在武康縣東南三十五里昔越大夫計然
嘗籌筭於此元林德芳詩○吳會東連控二州憑高
懷遠思悠悠雲迷大澤魚龍夜風散平原草木秋三

尺空悲文種劍五湖歸去子皮舟淒涼舊事成陳跡
惟有青山枕碧流

磨劍石 在長興縣北二十里俗傳陳武帝微時於
此礪劍今有膝跡及植鎗石穴尚存

菴畫溪 在長興縣西八里古木夾岸叢篠翳其下
朱藤蔽其上如是者十里花時游人競集有菴畫亭
宋劉濤詩○竹林深處杜鵑啼兩岸青青草色齊欲
識人間真菴畫朱藤倒影入青溪

玉竇泉 在長興縣西南六十五里唐處士鄭遨與
道士李道殷羅隱築室於泉口號三隱宋紹興中侍

郎錢伯言有碑

半月泉 在德清縣北三里一曰靈泉泉出石罅間狀若半月旱澇無盈涸宋蘇軾○請得一日假來游半月泉何人施大手劈破水中天

白蘋洲 在雪溪東南梁太守柳惲江南曲有三汀洲採白蘋日暮江南春後人因名

顧渚 在長興縣西北三十里昔吳夫槩顧其渚次原隰平行可爲都邑傍有二山相對號明月峽

古蹟

愛山臺 在府城內西北宋時築取蘇軾尚愛此山

看不足命名登臺則城外群山一覽在目

真賞亭 在安吉縣西三里上方山之麓宋乾道間縣令安鼎夢游此山後因往上方寺循行而南經此與昔所夢無異遂建亭名真賞蘇軾詩○自昔懷清賞神游杳靄間如今不是夢真是廬山

孝鷺塚 在長興縣東蔣灣唐天寶末邑人沈氏畜一母鷺將死其雛悲鳴不復食母死啄敗薦覆之又啣芻草列前若祭奠狀向天悲叫而死沈氏異之函二鷺埋此後人因名

嚴州府

擔鹽山 在淳安縣西北一百一十里錢鏐微時常販鹽經此因苦渴以柱杖觸巖泉忽湧出名柱杖泉
蔗山 在縣東北四十二里山分八面水注十派上有平田約二頃五代時宋齊丘讀書其上夫齊丘以讀書名于時乃為徐知誥謀主而廢其故主楊溥欲竊譚景升化書以為己作則投景升于江卒致積愆招尤放逐九華勢窮自縊不知其當時所讀者何書也

仙居洞 在淳安縣東南五十里接連十數洞皆有一竅可通往來最外一洞有石如龍蟠又有石座上作盆池龍口水注其中

乳洞 在淳安縣西六十里洞門廣三丈許仰視五六十丈青石如斲中有泉大旱不涸又有獅子洞其門差小中有白石蹲踞類獅形洞之旁有幞頭石屹然臨水高十餘丈廣八十尺漾井泉出其下又有石柱聳立山足高數丈圍丈餘又有石船長四丈高丈餘屹然卧水中狀如船尾懸一石如舵

威平洞 在淳安縣西七十里一名青溪洞宋宣和中賊方臘反韓世忠追方臘至此諸將莫知所入世忠潛行溪谷間問野婦得徑即挺身仗戈擣其穴格

殺數十人擒臘以出賊平改今名

閩仙洞 在桐廬縣北一十五里相傳昔有仙人居

此中有石牀卧之甚温石鼓擊之則鳴又有石龍石

橋巨蟾碧鷄之類宋黃裳作記并詩十絕

館仙洞 在桐廬縣西北五十里洞門有石壁乳竇

交映飛泉噴射相傳內有大蟾蜍翠鷄

靈棲洞 在壽昌縣西北四十里唐縣令穆均嘗游

此山李頰從行穆微吟曰○一徑入雙崖初疑有幾

家行窮人不見坐又日空斜頰繼其下句○石上生

靈草泉中落異花終湏結茅屋來此學餐霞

一指石 在桐廬縣西北四十里長一丈高五尺綴

巖谷間以手抵之則搖動人力多則不能移元楊維

禎○一指力可動萬夫莫能移

並山潭 在淳安縣東北八十里二潭相並如甕缶

然三潭在縣西一百里

十九泉 在桐廬縣西釣臺下陸羽茶經品第天下

水味謂此泉居第十九宋陳埴詩○十年不泛釣臺

船夢想高風日月邊今日偶來無住著再嘗灘下鬻

茶泉

古蹟

釣臺 在府城東五十里東西二臺各高數百丈漢嚴子陵垂釣處宋范仲淹詩○漢包六合網英豪

金華府

玉臺新詠序云金星與婺女爭華故曰金華

金華山 在府城北二十里一名長山又名金盆山越絕曰此山古聖采藥高且神黃初平初起於此成仙山之東有卧羊山即初平叱石處宋韓元吉詩○自笑金華老使君兩仙常約度層雲駕車尚有雙羝在縱入山前白石群

洞巖山 一名靈洞山在蘭谿縣東二十里高百餘丈山石礧巖鬱紆其靈洞凡六而著名者有三一曰

白雲二曰湧雪三曰紫霞三洞相環如貫珠其東北又有怪石屹立人稱為小飛來峯峯下有泉曰天池泉其清可鑑毫髮沿流由洞橋而出則曰洞溪元于石三洞詩○四山回合向幽泉古木蒼藤路曲盤一局殘碁雙鶴去石屏空倚白雲寒○斷崖怒湧四時雪虛壁寒凝六月霜倚樹老僧閑洗鉢碧桃花落澗泉香○洞門相對是吾家朝看烟雲暮看霞鐵笛一聲山石裂老松驚落半巖花

稠巖山 在東陽縣西北二十五里高四十五丈上有石巖巖中有石室深廣各十餘丈巖巒叢互故名

稠巖

雲橫山 在義烏縣南二十五里一名松山高一百四十丈周三十里有峭壁高百丈廣三十五丈俯臨華溪又有穿身巖饒虎巖如來峰七佛峰行道塔有石青白而紫曰飯石下有旋螭池水紋旋如螺形相傳梁僧傳翁居此人稱為大士

方巖山 在永康縣東五十里高二百丈周六里山四面如削駕飛橋石梯而登絕頂兩巖相峙為關上有亭曰透關亭自亭而入地皆平衍約數百畝中有一池水清瑩不竭池側有井曰硯井井後有巖高數

仞巖下石深二丈廣數丈僧因構室居之前有坑廣二三尺深二百餘丈曰千人坑坑側有石谷泉出罅間涓涓有聲下有小石巖相傳曰讀書巖不知讀書者謂誰也又有山曰桃巖山高一百丈周十里山石赤白相間狀類桃花有洞可容千人絕頂小洞可容二三十人

華釜山 在永康縣二十里高一百丈山上平曠四圍頗高其狀如釜又有曰五指巖曰白眉巖僧居其上即巖為室中可容數百輩山腰有白石如眉又有曰石倉巖高一百五十丈崖上有石如倉宋志謂其

名山記
卷之四
出米誕也

石室山 在永康縣東南三十里高百餘丈緣崖而上南北二穴相通可容數百人中有一石柱又有一石其形如龜國初李暉詩○石室初從混沌分呀然一竅氣氤氳山僧慣住龜鼉窟野老能穿虎豹群行怪帽簷常礙蘚坐驚衣袖忽生雲幾時更借禪床卧六月松聲絕頂聞

仙華山 在浦江縣北八里高一百五十丈周二十五里一名仙姑山又名少女峰東溪之源出焉峯有五內有石室可容數十人中一峰與東峰尤極峻絕

懸巖百仞有穴深黑風從中出薄於兩崖草木時動誠一邑之特勝但世傳黃帝少女於此上昇

寶掌山與仙華山相近山前雙峯列峙沿澗奇石若虎豹狻猊鍾鼎刀戟上下錯列前有高巖湧石類翩躚飛舞之狀亦號飛來峰峰下有泉甘冽折而北有石離立浦江山水唯此與仙華為最勝云

鮑令巖 在東陽縣南五里涵碧亭之上巋然巖起孤高峻拔有石刻鮑令巖三字以宋縣令鮑極嘗於此修禊故名

金華洞 在府城北三十里即道經所稱三十六洞

名山記 卷之四
天也其洞有三曰朝真曰冰壺曰雙龍朝真居山頂
巨石如龜橫當其穴穴中數石如人名群仙洞其旁
一石蒙覆玲瓏若被瓔珞然名真人洞洞中水涓涓
流名澣室下注泉一泓有嶺曰風門嶺風迅如扇上
有垂蓋類蓮華高四十餘丈絕頂幽悄莫測朝真而
下百餘步至冰壺洞洞在山腹深百尺餘泉聲淙淙
若金革然懸崖而下石皆離列水奔注其中條沫成
簾長三十餘丈雙石斬然壁立曰石筍自冰壺下五
十步至雙龍洞洞門軒豁如大厦洞中一穴有石屈
折而方名仙田田之下名石柙扣之有聲旁石嵯峨

高下儼如積雪下有巨石亦類龜形有潭曰龍潭水
尤清冽山之南曰鶴巖曰虎巖曰春草巖曰折竹巖
生龍鬚虎鬚二草可為燈炷山之西曰紫薇巖有石
室深廣數丈梁劉孝標棄官隱於其下著類苑山棲
志等書行于世郡人呼為書堂巖其東曰九龍洞有
泉奔湧潛溪之源出焉山之東南曰上霄洞在縣東
北三十里石壁環抱如城郭之象或曰即優游洞是
也

新洞 在府城東北三十五里宋紹興間一石摧下
旁露大竅風自中出振動山谷洞皆石乳登之若身

在瓊樓銀闕中。

上靈洞 在蘭谿縣東三十三里洞有三上曰白雲中曰紫霞下曰湧雪元吳師道詩○空山黃葉無行跡明月青松自落陰巖古每懷劉子隱地偏猶欠謝公吟

松化石 在永康縣東北延真觀前唐建中間道士馬自然指庭松曰此松已三千年矣當化為石至夕大風雨其松果化近觀山中松皆化為石夫天地間氣化形化萬有不齊松之化石無怪也但云三千年則化此未可拘余嘗過中部之橋山見古柏凌霄大可一丈圍皆軒轅時物迄今蓋四千二百年矣盤鬱蒼翠仍故物也

古蹟

銅牛人迹 在永康縣西一十七里有石高丈五上有牛人二迹各長八寸相傳號銅牛人

鶴鳴畷 在永康縣東北三十里相傳石翁山梁時望氣者言有王氣鑿之有雙白鶴飛鳴化為真人乘霞而去

衢州府

爛柯山 在府城南二十里道書所謂青霞第八洞

名山記
天爛柯福地也。晉樵人王質伐木于此山，見二童子對奕，置斧於坐而觀。童子與質一物如棗核，食之不飢。局終，童子指示之曰：「汝斧柯爛矣。」質歸鄉間，已及百歲，無復矐人矣。唐孟郊詩：「仙界一日內，人間千歲窮。」雙棋未變局，萬物皆為空。樵客返歸路，斧柯爛從風。唯餘石橋在，猶自凌丹虹。

烏石山 在府城西四十里，延袤十里，高二百五十仞。巨石周匝如城，又有石門，俗號寨門。相傳黃巢南寇時，人設此以避亂。中有水田，上有烏石寺。宋張浚岳飛題名于石。紹興丙寅，清河張浚過此，聽顏師鼓

琴而去。岳飛奉旨趨闕，復如江右，假宿幽巖，游上方覽山川之勝，志期為國速欲掃平黠虜，恢復輿圖，迎二聖于沙漠，輔聖王無疆之休。紹興二年十月初三日，題翁青山詩：「聽琴慷慨懷張浚，題壁英忠仰岳飛。」

三衢山 在常山縣北二十五里，昔有洪水瀑出，派茲山為三道，故名。峭峰竒石，玲瓏紺碧，天矯槎牙，不可名狀。上有巖洞，名曰碧玉，中有石室，旁通二門，榜曰玉龍。

江郎山 在江山縣南五十里，高六百尋，一名金純。

山又名湏郎山東陽記云金純山有三峰悉數百尺色丹奪目不可仰視杜佑通典云湏郎山發地如筍有三峯太平寰宇記江郎山有五色石日照炫燿但文思博要云江氏兄弟三人登山巔化為石此或未可據也山有池產碧蓮金鯽山半有巖危石空懸中可結廬下有虎跑泉清甘不涸

浮蓋仙山 在江山縣南一百里中有仙洞石壇石屏石鍾石筍諸勝又多緋桃但華而不實旁有溫峯巖石倒垂如鷄味有泉出焉

宋村巖 在開化縣南四十五里有石人及石龍首

水出龍口不絕下有石臺承之皆自然無斧鑿痕

九仙巖 在西安縣東五十里狀如屏倚當其中凹處撐柱上下為屋數間唐徐安貞讀書於此

仙霞嶺 在江山縣南一百里宋史浩帥閩過此募人以石甃路三百六十級凡二十八曲長二十里趙汝騰詩○鷄鳴秣馬度仙霞鳥道迢迢望去賒暗水盡從荒澗落好山剛被暝雲遮

翁巖巖石層列洞曰左坑洞凡六七所中有石佛石泉石田石傘在焉

太真洞有泉出焉一名玉泉洞與此相通者又有三

洞一曰靈龜洞今名太一其泉亦名太一泉中產石
龜有青黃白三色一曰碧雲洞舊名葱嶺其下有潭
廣三丈餘一曰朝陽洞石際水流莫測其深

處州府

天王山 在府城西二里又一里曰三巖中巖有飛
瀑瀉落宋皇祐初知州李堯俞名其右曰清虛中曰
白雲左曰晨曦姜特立詩○百尺飛泉晴亦雨四時
陰穴夜吹風

石僧山 在府城西四里山腹有石狀如僧宋劉大
中詩○雲作袈裟石作身巖前獨立幾經春有人問
我西來意默默無言總是春

石羊山 在府城西南一十五里山形如羊太平寰
宇記云石羊山有蘭巖溪溪有一穴穴口有大樹仰
視杳然博物志云千載木也王安石詩○溪水清漣
樹老蒼行穿溪樹踏春陽溪深樹密無人處惟有幽
花度水香

小蓬萊山 在縉雲縣東一十二里仙都山西潭水
中上多怪石奇樹潭之南有石壁高可數仞多有名
公題詠刻於石游者泛舟而入負出塵外

仙都山 在縉雲縣東二十三里高六百餘丈周三

百里一名縉雲山又名丹峯山圖經云唐天寶中山有靈異勅改今名。

石門山 在石蓋山之西十里兩峯對峙如門

瀑布山 在縉雲縣北三十五里有飛泉灑落二百餘丈

大樓巖 在遂昌縣西一百五十里有飛瀑春夏不絕冬凝結倒懸猶玉乳巖下為龍泓者三十有六

龍安洞 在遂昌縣西一百四十里對大樓巖有飛瀑流注為三十六泓第四泓號龍井昔有淨空禪師振錫其側有黃龍出變或禱雨則應民有獻楮錢者

無得過三百踰數則推出不受。

紹興府

會稽山 在府城東南一十二里揚州之鎮山也史記註禹到大越上苗山爵有德封有功更名會稽

石帆山 在府城東一十五里遙望如張帆臨水唐詩石帆來海上天鏡出湖中

禹廟之西曰中峯下有禹寺寺之後相傳為禹陵陵有禹井有菲泉以禹菲飲食故名山之東北接觀嶺其上有磐石屹立曰降仙臺下有茗塢淘沙徑山南曰茅現一名玉笥其別峯曰石傘曰香爐西北五里

與宛委山相接宛委山上有石墮壁立中有孔穴號
陽明洞即舊經所謂三十六洞天之一洞也夏禹
發之得赤珪如日碧珪如月又中得金簡玉字之書
悟百川之理

秦望山 在府城東南四十里為衆峰之傑史記始
皇嘗登此以望東海因名唐李白詩○東海橫秦望
西陵拱越臺湖清霜鏡曉浪白雪山來

固陵又名西陵越王勾踐五年五月與大夫種范蠡
入臣于吳群臣皆送之浙江之上臨水祖道軍陳固
陵大夫種為辭祝之其辭曰○皇天祐助前沉後揚

禍為德根憂為福堂威人者滅服從者昌王離牽致
其後無殃君臣生離感動上皇衆夫悲哀莫不感傷
臣請薄脯酒行二觴越王仰天太息舉杯垂涕默無
所言種復祝之其辭曰○太上德壽無疆無極乾坤
受靈神祇輔翼我王厚之祉祐在側德銷百殃利受
其福去彼吳廷來歸越國即此地也至五代末錢鏐
尚識易陵為興唐劉滄詩○蟬噪秋風滿古堤荻花
寒渡思淒淒潮聲歸海鳥初下草色連江人自迷碧
落清分平楚外青山晚出穆陵西此來一見垂綸者
却憶舊居明月溪

五泄山 在諸暨縣西五十里下有溪亦名五泄溪
兩山夾溪壁立雲漢雙瀑奔瀉沿歷五汲下注溪壑
淙激如雷震撼巖谷飛沫如雪溟濛數里俗名小鴈
蕩云

白水山 餘姚縣南六十里山壁峭立曰瀑布嶺上
有泉四十二道素練垂空而下恒暘不竭嶺有三台
峯有屏風巖下有龍湫有屏風潭有洗藥溪別有巖
曰寒草巖又有石屋雲根蓋絕勝也

四明山高一萬八千丈周二百一十里跨越數邑由
鄞小溪入則稱東四明由餘姚白水入則稱西四明
由奉化雪竇入則直謂之四明流峙叅錯深迥幽竒
與人境殊絕道經所謂第九洞天也峯凡二百八十
有二迴合嶺聳中曰芙蓉峯有漢隸刻石上曰四明
山心右有石窓四面玲瓏如戶牖通日月星辰之光
一名四窓

陸龜蒙○石窓何處見萬仞倚晴空積
靄迷青嶺殘霞動綺旒

四明山心稍北曰潺湲洞洞之下曰過雲巖雲縹緲
不絕者二十里人經行雲中故曰過雲南曰雲南北
曰雲北

東山 在上虞縣西南四十五里晉太傅謝安所居
也一名謝安山巍然特立于衆峯間拱揖蔽虧如鸞

鶴飛舞山巔有謝公調馬路有白雲明月一堂遺址
千嶂林立下視滄海水相接蓋絕景也旁有薔薇
洞相傳游宴之所茲雖蔓草荒塞而古色不改宛然
有六朝氣象唐李白詩○不到東山又薔薇幾度花
丹池山 在嵯縣東七十二里舊名桐栢山上有金
庭洞道書以爲第二十七洞天有丹池赤水唐天寶
六載改今名宋晏殊類要越有桐栢之金庭養真之
福地

嵯浦 在嵯縣西南四十五里與石欄干相連蓋溪
山竒絕之地宋紹興中有方士李季憇道旁遇一異

人問季何來季曰秦太師遣往相栢設醮祈福其人
曰秦今死矣張浚劉錡皆當起爲將相秦豈得存耶
季異之亟去比至天台則秦之訃至矣豈山川靈秀
固自有異人往復云

沃洲山 在新昌縣東三十五里與天姥對峙道書
以爲第十五福地晉支遁居之有養馬坡放鶴亭唐
劉文房詩莫買沃洲山時人已知處

天姥山 在新昌縣東南五十里東接天台寰宇記
登此山者或聞天姥歌謠之聲道書以爲第十六福
地唐李白詩天姥連天向大橫勢拔五嶽掩赤城

石傘峰 宋元厚之○竒峯如傘見遙青玉笥山頭
地有靈三逕荒涼丞相隱一篇清絕放夫銘

清風嶺 在嵎縣北三十里上有王烈婦祠元李孝
光○山下江流幸自清山頭明月已無情此心若愧
王貞婦莫向清風嶺上行

若耶溪 在府城南二十五里與鏡湖合西施採蓮
歐冶鑄劍於此唐徐海游此嘆云曾子不居勝母之
里吾豈游若耶之溪因改五雲溪

樵風涇 在府城東南二十五里漢鄭弘採薪得一
遺箭頃之有人覓箭弘與之問弘何所欲弘曰常患
若耶溪載薪為難願朝南風暮北風後果然世號樵
風涇宋之問詩歸舟何慮遠日暮有樵風

寧波府

阿育王山 在府城東五十里舊名鄮山晉太康中
并州人劉薩訶得阿育王塔於此因名

聖公山壁立千仞其中石室虛明
姜山有石洞三其一最大可容數十人後一洞差小
上有小穴形圓如月

雪竇山 在奉化縣西北六十里中有雪竇寺千丈
巖瀑布泉藤龕錦境池含珠林隱潭形勝非一

石樓山 在奉化縣西南六十里有石如屋兩崖夾澗飛瀑亂下

招寶山 在定海縣東五里一名候濤山山半有碁子坪凡欲取碁子者先以白飯撒之翌日可得白子以黑豆撒之翌日可得黑子宋呂祖儉有游山記

蛟門山 在定海縣東四十里一名嘉門山出此即大海洋古人稱蛟門虎蹲天設之險即此地

伏龍山 在定海縣西北八十里山跨東西兩海門狀如卧龍內有千丈巖海眼泉石壇乳井

補陀落迦山 在定海縣東北故昌國縣海中佛書

所謂海岸孤絕處也往時高麗日本新羅諸國皆由此取道以候風信一名梅岑山

灌門海 在定海縣東北故昌國縣海中有砥柱屹立中流望之如人拱立水滙于此旋漏若沸舟行必投以物殺其勢而後過風雨將作有聲如雷

古蹟

石筍 在四明山山有雙石如筍高數丈野花叢生其頂春時爛若雲錦宋時每遇過密之時輒三年不榮齊唐嘗為之贊范鎮詩鼎湖龍去蒼髯斷二載叢花不記春

石硯 在慈溪縣西南五十里白巖山崖罅間有石硯可見而不可得人異之。

台州府

蓋竹山 在府城南三十里一名竹葉山有竹如蓋故以為名中有洞名曰長耀寶光之天洞淵集所謂第十九洞天也上有飛霞石有香爐天門二峯最為游覽之勝。

天門山 在府城西六十里高數千仞旁有香巖石井釣臺白竹岡西麓有閩風臺宋王士弘詩○碧落簫音隔彩霞閩風臺見地仙家手携青杖萬年竹鬢中天絕頂無人到流水桃源莫況槎。

金鰲山 在府城東南一百二十里東有小澗昔有人夜藏舟山下近視之乃一金色巨鰲宋建炎四年金人入寇高宗航海嘗泊此山留四旬始還紹興無名氏詩○黃帽當年轉舳艫東浮鯨海入三吳中興事業風波惡好作君王座右圖。

瀑布山 在天台縣西四十里一名紫凝山有瀑布水陸羽記云天下第十七水蓋與福聖國清二瀑為三其山產大葉茶

石橋山 在天台縣北五十里旁有方廣寺有小石橋架兩崖間龍形龜背有兩澗合流於橋下橋勢峭峻過者目眩心悸晉孫綽賦跨穹窿之懸崖臨萬丈之絕濱即此宋趙湘詩○白石峯猶在橋橫一逕微多年無客過落日有雲歸

天台山 在天台縣西一百一十里道書是山上應台星超然秀出有八重視之如一帆高一萬八千丈周迴八百里山去天不遠路由福溪水險而清前有石橋廣不盈尺長數十丈下臨絕澗惟忘其身然後能濟濟者梯巖壁援藤葛始得平路見天台山蔚然

奇秀雙列於青霄上有瓊樓玉闕天堂碧林醴酒仙物畢具也

司馬悔山 在天台山後道書所謂第十六福地也唐司馬子微隱于此山被徵而出至新昌而悔之人遂以名山新昌亦有司馬悔橋夫子微嘗以天隱自號亦必待出而後悔所以孔稚圭之移文後人所當三復也

獅子山 在太平縣東三十里上有石菴方廣五丈高三丈五尺相連曰雪山一名晉源山南有百丈巖羅漢洞智者泉荷花池碧蘿潭相傳晉王居此山下

有小碑曰晉王游適之地云

玉霄峯 在天台縣北三十五里重崖疊嶂松竹葱
蓊前有雙石夾徑唐陸龜蒙詩永夜只知星斗近雲
深猶見海山微

華頂峯 在天台縣東北六十里周迴百餘里高萬
丈絕頂東望滄海俗稱望海尖草木薰郁殆非人世
夏有積雪唐李白詩天台隣四明華頂高百越門標
赤城霞樓棲滄海月即此峯也

麻姑巖 在天台縣西南二十五里一名仙姑巨石
谿訝如人立昔麻姑訪王方平於此上有洞麻姑像

存焉

隱身巖 在寒石山旁唐貞觀中豐干禪師謂閻丘
太守曰寒山拾得即文殊普賢後身也閻丘往見之
二人笑曰豐干饒舌耶既而隱身入巖中巖即隨合
玉京洞 在赤城山道書十大洞天之第六晉許邁
嘗居此與王羲之書云白山陰至臨海多有金庭玉
堂仙人芝草謂此

丹霞洞 在天台縣北一十五里舊傳葛玄煉丹處
傍有仙人拍手巖飛瀑數百尺下為靈溪宋劉昭禹
詩雲開孤月上瀑噴一山寒

名山記 卷之四 三十一
桃源洞 在天台縣西北二十五里一名桃花洞又名劉阮洞漢永平中劉晨阮肇入山採藥故事詳見山經仙籙為世所傳

括蒼洞 在僊居縣東南三十里名曰成德隱元之天蓋第十洞天也宋光宗在東宮時書瓊章寶藏四字鎮之劉光詩古洞藏真不記年即此

尾閭 在寧海縣東海中與海門馬筋相值惟高山可望其水湍急陷為大渦者十餘處百凡浮物近之則溺蓋泄水處也

温州府

存焉

隱身巖 在寒石山旁唐貞觀中豐干禪師謂閻丘太守曰寒山拾得即文殊普賢後身也閻丘往見之二人笑曰豐干饒舌耶既而隱身入巖中巖即隨合玉京洞 在赤城山道書十大洞天之第六晉許邁嘗居此與王羲之書云自山陰至臨海多有金庭玉堂仙人芝草謂此

丹霞洞 在天台縣北一十五里舊傳葛玄煉丹處傍有仙人拍手巖飛瀑數百尺下為靈溪宋劉昭禹詩雲開孤月上瀑噴一山寒

桃源洞 在天台縣西北二十五里一名桃花洞又名劉阮洞漢末平中劉晨阮肇入山採藥故事詳見山經仙錄為世所傳

括蒼洞 在僊居縣東南三十里名曰成德隱元之天蓋第十洞天也宋光宗在東宮時書瓊章寶藏四字鎮之劉光詩古洞藏真不記年即此

尾閭 在寧海縣東海中與海門馬筋相值惟高山可望其水湍急陷為大渦者十餘處百凡浮物近之則溺蓋泄水處也

温州府

華蓋山 在府城東下有容成洞為道書第十八洞容成太玉之天上有石龜池青牛谷丹井老松泉蒙泉之勝唐張又新詩○一岫坡陀凝綠草千重虛翠透紅霞愁來始上消歸思見盡江城數百家有江山一覽亭其巔有玄妙觀山麓有真華觀其東南曰積穀山兩山相連形如高廩上有積穀亭下有飛霞洞旁有飛霞觀相傳仙侶劉根隱于此又有謝客巖謝靈運書白雲曲春草吟於石崖今已蕪沒惟謝客巖三篆字尚存下有春草池又有謝池謝靈運嘗游息于上池水澄湛俗呼靈池張又新詩○郡郭東南積

穀山謝公會是此躋攀。今來唯有靈池月，猶自嬋娟一水間。

天臺山 在府城北一百五十里，山形如甌，旁有三峯環列，先後中有傳巖瀑布泉蟾蜍石龍聽洞石柱諸勝。繫王十朋詩：○鴈山一柱插雲霄，三井松蘿柱亦高。蓬華深懷祀人念，擎天端賴柱堅牢。

甌海 一名蜃海，潮之消長俱有定候，而海山之際常有蜃氣凝結，忽為樓臺城櫓，忽為旗幟甲馬錦幔。仙巖山 在瑞安縣四十里，大羅山之陽，道書第二十六福地，上有二皇井，巖頂有黃帝池，廣五百餘畝。

水分八派，下有玉函潭、龍鬚潭、雷潭、梅雨潭、三姑潭。宋陳傅良讀書于梅雨潭，傅良詩：○袞袞群山俱入海，堂堂背水若重闔。怒號懸瀑從天下，傑立蒼崖夾道陳。晉宋至今堪屈指，東南如此豈無人。結廬作對，吾何敢聊向樵漁寄此身。

西際山 西南北三面蒼崖峭立，環若翠屏，惟東一面軒豁如門。大海在前，潮生日出，蓋偉觀也。北有瀑布從崖頂懸空而下，飛流濺沫，雖盛暑亦涼氣逼人。

鴈蕩山 在樂清縣東九十里，高四十里，東聯溫嶺，西接白巖，南跨玉環，北控蒼山，頂上有湖，方可十里。

水常不涸春鴈歸時多宿于此故名山有東西內外谷東外谷之峯五東內谷之峯四十有八西內外谷之峯各二十有四建寺一十有八各有殊名皆宋以來好事者所命也

林亭山 在新羅山之南有大石瞰海登之可望海中日出

南鴈蕩山 在平陽縣西南一百里北自穹嶺南自施巖皆名鴈蕩上有明玉峯峯頂有池五代時僧願齊尋訪名山至此曰此山水盡處龍鴈所居豈非西域書所謂東南大海際有鴈蕩龍湫者耶因結茅其

間其相連者曰白雲山高插雲漢行人援藤而上號曰藤道

龍湫在鴈蕩山宋范宗尹詩龍湫信奇絕飛泉落雲間

記文

西湖諸山志

薛應旂

錢塘孤山屹立西湖中有金沙井有六一泉有林逋放鶴亭逋墓在其南巨石山一名寶石山在西湖北高六十三丈周迴一十三里旁有石甌山上有七層古塔今稱爲保叔塔山麓有纜船石相傳秦始皇東游汎海艤舟於此舊志西湖本通海東至沙河塘南

向大江也故始皇纜舟於此宋宣和中鑄此石爲佛
遂名爲大石佛北有落星石二一在山北址一在山
後巖上巾子峰在落星石後西有參寥泉詳見通志
西爲寶雲山又西爲葛嶺相傳爲葛洪煉丹之所嶺
上有葛仙翁墓洪字稚川晉時人好神仙導養之術
見高士郭文舉於大滌山中悟道結廬西湖修真著
書號抱朴子又西有虎頭巖山形突出若虎頭然吳
越納土後望氣者云杭州有王氣宋藝祖命鑿之巖
下有儀王墓王名仲湜宋宗室也靖康時徽欽北駕
六軍欲擁王而立之王堅拒不從未幾高宗即位

於應天王詣行在命爲濮王後薨葬于此葛嶺之西
爲履泰山有棲霞嶺嶺下有岳武穆王墓有翊忠祠
祀劉允升施全又有牛臯墓在劔門關畔臯字伯遠
汝州魯山人爲岳武穆部將累立戰功轉寧國軍承
宣使紹興十七年上巳日都統制田師中大會諸將
臯遇毒亟歸語所親曰臯年六十一官至侍從即死
無恨所恨者南北通和不以馮革裹屍顧死牖下耳
明日卒或言秦檜使師中毒臯云景定初追封輔文
侯嶺後有掃箒塢黃龍洞履泰之右爲仙姑山有張
憲墓仙姑山西爲青芝塢青芝塢西南爲慶化山水

竹塢宋置部司前軍寨旁有周杞墓杞處州人建炎三年知常州值苗劉之亂杞倡義勤王以功除右文殿修撰其兄格建炎初爲浙西提刑死於陳通之亂贈龍圖閣學士俱葬于北山兄弟忠義名震一時云又西南爲駝巘嶺過行春橋入九里松唐刺史袁仁敬守杭植松以達靈竺凡九里前有小方池曰玉泉旱潦不竭舊志謂流出山外溉田三千餘頃折而南爲仙芝嶺西爲集慶山又西南過合澗爲武林山俗稱西山在錢塘縣西一十五里高九十二丈周一十二里其峰之北起者曰北高峰山前有飛來峰晉咸和間西僧慧理登而歎曰此乃中天竺國靈鷲山之小嶺不知何自飛來仙靈隱窟今復爾否因名山曰靈隱建靈隱寺命其峰曰飛來支分而回拱者又有石笋靈鷲稽留月桂蓮花諸峰有龍泓青林玉乳射旭呼猿諸洞有三生石有煉丹井有冷泉亭又有蕭公茯苓白沙金沙諸泉有下天竺寺中天竺寺上天竺寺西有嚴將軍墓將軍名德太平當塗人元末從我高皇帝征伐有功累授中翼元帥府統軍元帥會張士誠據兩浙命德統兵征之連戰皆捷遂令守禦杭州洪武元年天台賊反德往討之中流矢卒

上悼之贈驃騎大將軍封天水郡公勅有司治葬于此南屏山刻家人卦中庸樂記篇乃唐人八分書後人誤刻爲司馬溫公書其凌空而中峙者爲慧日峰今以淨慈寺後卷石刻慧日峰亦誤也又南曰煙霞嶺洞壑虛窈泉味清甘聲如金石熙寧間郡守鄭澣名之曰水樂洞陟磴屈折而上曰南高峰在南北諸山之界玉岑山在南屏西南其對曰赤山山之陰有簪箕泉赤山之北曰三台山有于肅愍公墓三台山而北曰小麥嶺又西曰大麥嶺其傍爲花家山西北爲靈石山又西爲鷄籠山風篁嶺嶺下宋陳剛中墓

今廢剛中閩人建炎初任太守寺丞上疏議恢復忤秦檜遂與張九成等七人同謫剛中謫知安遠卒塋于此上有龍井龍井之南爲九溪其西爲十八澗栗山在錢塘縣西十七里高六十二丈周十八里有石人嶺玉女巖過嶺爲西溪有趙襄恪公墓公名密中興戰將也大慈山在縣西南十里有虎跑泉南曰筆架山有忠節祠祀宋大學士徐應鑣又南曰包家山有冷泉峪多桃花號小桃源又南曰梯雲嶺慈雲嶺嶺之南曰龍山一名卧龍山有登雲臺珍珠泉宋籍田郊壇高禩壇遺址在焉稍南曰妙因山有吳越國

名山記 卷之四 四十一
文穆王忠獻王墓。文穆王名元瓘。武肅王子。忠獻王名仁佐。文穆王子。宋建表忠觀。月輪山在龍山南。形圓如月。其高聳者為月輪峰。有六和塔。五雲山在龍山西南。高百丈。周十五里有井。大旱不涸。秦望山在錢塘縣南。一十二里。高一百六十丈。輿地志。秦始皇欲渡會稽。登此南望。因名。有羅剎石。定山在錢塘江上。高七十五丈。周廻九里有竒。江濤至是輒抑。過則瀆怒若雷。浮山在縣東南四十里。海潮入錢塘。江勢若雷霆。而浮山峙於江中。與漁浦諸山相望。潮乃廻伏。激射若神。憑焉。廟山在浮山南十里。潮勢至此方殺。西湖故明聖湖。周統三十里。漢時金牛。見湖中人言明聖之瑞。遂稱明聖湖。介于錢塘。又稱錢塘湖。負郭而西。故又稱西湖云。

游紫陽洞記

楊應詔

歲乙卯冬至。錢塘時積雪盈旬。余穿小幽徑。轉比林。行雪中。抵其麓。坐石圻。紫陽洞。天上旁睨。有小石堵。門予排石入之。則見林竹。嶒呀中有石池。泓然樵者曰。此野鶴仙鍊丹處也。池水清寒。中有菖蒲池。後有采芝園。以雪弗果。往遙睇前。忽石礎突出。有一石類林鹿。蹲其間。余亟往趨之。雪峻峻。落余乃復循石堵。

名山言 卷之四 四三
出憇歸雲巖見飛靄流氛從巖洞中出公側石罅徑
東上欲訪野鶴仙祠遡古瑞石洞未至洞少許則見
傍嵐岫巉巖石乳垂下奇甚洞深窈紆遂游玩久之
出又沿石梯前始至祠拜野鶴遺蛻瞻其像清臞而
飛逸真若羽衣自海天西來乃循庵側復穿洞傍忽
又至一山巒洞口傍大鐫曰朝元路迺捫蘿徑至其
側見兩崖岉削壁起中微一線路天光隱隱頂忽一
黃木跨其上狀若石梁然余欲梯之叢雪數尺許不
能進返至小蓬萊衣履交濕矣道澄延余至列仙堂
已謁老君遺像出余擁石欄佇觀欄側有古大樹數

十株皆生石上俯視錢塘一抔萬家玉宇玲瓏心益
奇甚復自迎真橋東去不數步稍下見石扇中開余
轉而出兩巖傍有大獅石蹲踞不暇顧亟往迎真島
訪弔徐洞陽遺跡見洞門粼粼雪已闕而封矣不得
已過月波池謁紫陽至望江閣徙倚忽天風蓬蓬與
江聲從余肘背後東來余亟命道澄啓玉虛樓趙孟
頴聶大年等諸牌誌讀之稍久下至見巖雪稍已開
霽乃披青芙蓉展憇左右盼而懸石露奇綺恠鸞駮
鳳翥補衣石則又獻萼于前與歸雲角峙景益清逸
迺據青芙蓉頂徬徨四瞩晞三吳之全壤喟故宋之

名山言 卷之四 四三
遺宮悽然如狂如遯不已道澄曰子何感慨如是余
顧道澄歎曰嗟乎子知此石撐揭乾坤幾何年于此
而其閱世者不多耶方錢武穆擁兵下吳越據此宋
高宗南渡國江南一時山川文物何如無論錢封宋
社乃張紫陽平叔徐太師丁野鶴之仙跡亦久陳莫
可詰矣而少保肅愍褚伍諸公嶢嶢何往眼中所覩
者惟野馬四時寒暑之運孰隆施是而其伏也無窮
其賞也無盡其精靈與余俱亭列于前者不可磨滅
迄今煌煌猶昨日餘者安存耶

錢塘六井記

蘇軾

潮水避錢塘而東擊西陵所從來遠矣沮洳片鹵化
爲桑麻之區而久乃爲城邑聚落比今州之平陸皆
江之故地其水苦惡惟負山鑿井乃得其泉而所及
不廣唐宰相李公長源始作六井引西湖水以足民
用其後刺史白公樂天治湖浚井刻石湖上至于今
賴之始長源六井其最大者在清湖中爲相國井其
西爲西井少西而北爲金牛井又北而西附城爲方
井爲白龜池又北而東至錢塘縣治之南爲小方井
而金牛之廢久矣嘉祐中太守沈公文通又於六井
之南絕河而東至美俗坊爲南井出湧金門並湖而

名山記 卷之四 四
北有水閘三注以石溝貫城而東者南井相國方井之所從出也若西井則相國之派別者也而白龜池小方井皆為匿溝湖底無所用閘此六井之大畧也熙寧五年秋太守陳公述古始至問民之所病皆曰六井不治民不給於水南井溝痺而井高水行地中率常不應公曰嘻甚矣吾在此可使民求水而不得乎乃命僧仲文子珪辦其事仲文子珪又引其徒如正思坦以自助凡出力以佐官者二十餘人於是發溝易甃完緝罅漏而相國之水大至坎滿溢流南注千河千艘更載瞬息百斛以方井為近於濁惡而遷

之少西不能五步而得其故基父老驚曰此古方井也民李甲遷之於此六十年矣疏涌金池為上中下使澣衣浴馬不及於上池而列二閘於門外其一赴三池而決之河其一納之石檻比竹為五管以出之並河而東絕三橋以入于石溝注于南井水之所從來高則南井常厭水矣凡為水閘四皆垣墻扁鑄以護之明年春六井畢修而歲適大旱自江淮至浙石井皆竭民至以罌缶貯水相餉如酒醴而錢塘之民肩足所任舟楫所及南出龍山北至長河鹽官以飲牛馬給沐浴方是時汲者皆誦佛以祝公余以為水

名山記 卷之四 四十五
者人之所甚急而早至於井竭非歲之所常有也以其不常有而忽其所甚急此天下之通患也豈獨水哉故詳其語以告後之人使雖至於久遠廢壞而猶有考

遊天目山記

慎蒙

天目之山雄視兩浙高可三千八百丈橫亘八百餘里故洞玄集第爲三十四洞天云隆慶歲辛未三月自餘杭啓行行七十里日暮始宿大坂厥明行三十里至滿嶺南北兩山皆盤旋曲折似漸入佳境矣再行二里許山之北石骨林立忽開一洞曾有道人

經過問之樵人曰此洞高若干許答以高六尺有竒道人以手杖度之果符其數當有金銀二物以厭其勝覓之數日果得二山一名金鰲塢一名銀山總督軍門立碑嚴禁搜挖有可稽者申刻始駐雙清莊入浮玉禪林瞻梁昭明太子遺像以昭明曾讀書於此偶目疾痛甚洗而復明故以雙清名莊也山僧道其源委甚悉次早西行入山初至仰止亭次倚翠亭旁有巨石高而且方石名倚翠因以名亭也三至如斯亭泉橫澗道衝出勢不可屬作石梁以渡之曰半山橋左有嚮水岩泉水從右奔注側耳聽之其琤琤之

名山言 卷之四 四十一
聲若自石中出者。傳言石石虛空以故。聲應如嚮。理不可曉。再上有觀音石。平正如砥。自眠牛亭。少折而上。見古杉一株。大可九圍。其枝皆下向。復昂。勢如虬龍。殊爲可玩。遂至真際亭。真際者乃高峰和尚所賜。高麗國王名也。碑刻尚存。予勞頓暫憇。僧捧茶出迎。相與談。兩山夾道。流泉瀑布之勝。且謂此亭扼一山之吭。澗泉從此下注。雙清約十里有奇。中有一道分。流左右。不知所歸。山田賴以灌溉者。十頃。利濟之功亦甚博矣。遂入高峯塔院。高峰者寺之開山祖師。有定性子題其居曰真空洞。飛雲閣。閣皆倚獅子岩。而立。內有高峯肉身。以缸覆之。塗以灰。葬於獅子口中。其形唇掀而上。昂毫髮不爽。頃之僧乃出。高麗銅鉢。孟撫摩之。製極精巧。啓視窗外。則臨崖千丈。不測。中有一石直起。爲象鼻峰。獨立獅座之表。亦山中一佳境也。入山初尚雨霽。少頃雲霧沉。狸不辨咫尺。風急。復霽。遂命肩輿北向。而東路南有玉柱峰。形方而微黑。僅有縐紋。可數不及。鴈蕩遠甚。北有一石突出。而平曰望江臺。久不經人迹。草樹已森然矣。至普同塔院。又見一大樹。減前一圍。特中分二幹。直起。尤爲奇絕。坐中峯塔院。出高麗所賜袈裟。長計一丈有五。

名山記 卷之四 四十二
四百六

布之鮮潔如初。豈佛教之傳獨盛於梁，故能左右王侯若是也。復下藏雲塔，悟道亭。又東入斷崖塔院，斷崖者亦法師之別號也。當門有一樹，其高大不減普陀。又東往正殿，入幻住菴。又南望立玉亭，乃中峰脩真處也。於山麓特伸一股，其地甚平。計一畝許，其厓深幾萬丈，下澗無底，殊不可措足。東西竒峰千仞，壁立亭則誅茅爲之，且覆以三松。一松獨偃卧其上，亭隱然若匿。予側身俯首而出，仰視俯臨，令人心悸目眩，深邃幽寂，竒麗六者兼之。古稱蓬萊仙島，真爲不忝。此天目第一竒絕處也。東坡忠觀碑記所謂龍飛

鳳舞鳳舞，即此山之麓。而龍飛則山之枕。中峯塔北者，時陰風怒號，凜冽如冬。從者皆以兩手附耳。古稱山深六月寒，信哉。昔日中峯迷昧不通，自誓獨立七日，不悟當墜崖而死。越七日，明見心性，因名其亭以立玉第。其松爲悟道記志也。蓋中峯初不識字，既悟空，遂能詩。有梅花百詠，與馮海粟相爲倡和。元趙氏子昂嘗師事之。如詠天目詩云：一山未盡一山登，百里全無半里平。疑是老僧遙指處，只堪圖畫不堪行。亦其一驗也。後中峰乃東入幻住庵，從遊說法者甚衆。頗厭應接，復往西住。其至者愈多，遂別避跡山坳。

名山言 卷之四 四
與衆立談。忽雷雨大作。長逝不返。名爲活埋庵。庵廢而遺址尚存。追想遺躅爲之悵然。其幻化之道亦神矣。遂轉西南下。坐着衣亭。亭前山茶海棠。僅爾半殘。氣候寒暖。遂與下界頓異。若此亭之上。有望雲庵。惟一老僧坐石。補衲竟不施禮。似絕世網。又佛家苦空之一端也。少頃入真空洞。一飯飯畢。暫卧僧房。未幾家人報予曰。天霽甚已。非初入山景象矣。促予起。起坐洞中。南望新城巖州。以及桐廬富陽群山。近者尚有形可指。再遠者望之則如藍玉萬片。又再遠者則淡雲一抹。竟不知其爲山也。雖使王維執筆能寫此。

巖態虛空色相也。耶僧聽泉復語予。以北有張公洞。昔張真人曾鍊丹於此。同僧掃石以坐視之。則石之突出而幘幘者。計二十丈。軒豁可愛。西有石壁四五丈。橫鎖洞口。泉皆自石中流出。名曰石骨水。如梅雨絲絲而下。較之他水氣味甘重。迥絕。又一小洞天也。天色愈霽。日始申。僧云。如此晴霽。十不及見二三。故傳爲雲霧山。迨予直登仙頂最高處。復從斷崖塔後。進歷三臺。涉其頂。恍若置身青雲之上。傍有石如鐵板狀。似斷而屬。俗傳乃仙人所鋸者。中有一石獨聳上。薄雲漢生而疑目視之。則東之臨安。北之孝豐。安

名山記 卷之三
吉東之金陵北之寧國諸山歷歷如指掌而前之所見南山愈小愈下又悉如蟻封矣前後蒼翠逼人雲山滿目令人塵慮一洗快怏然若無所容輿人及從行者並拊掌大笑響應山谷自以平生所未見予亦忘其烟霞之癖也蓋予行至臨安再至大坂三至餘杭皆遇雨而返越四往始登昔人云一丘一壑造化所靳信哉信哉且予登頂者未及一時南則皎日爛然而北之始所見諸山雲霧蒸蒸杳無形跡開闔顯晦倏忽萬狀造化小兒一至於此舊人題曰天下奇觀信哉日暮下山歸張燈夜宴僧曰此自今一日所見言之也至秋九八月霧氣上升下望諸山茫洋如海至冬雪嚴寒滴霏凝結其圍可尺許長一丈有餘名曰銀柱經月不消真如圖繪聽其言并追憶所見心神飛越至夜分始就寢豈佛家所謂理障雖非人欲亦損性靈者耶次早復歷覽如昨午後出山因題其閣曰人世蓬萊而返

遊徑山記

慎蒙

嘗讀武林志謂徑山者至天目則在所必由之徑故曰徑山又以此徑於餘杭臨安二縣爲會通故以徑名然考其香火之所由建則自唐開山和尚名法

欽號國一者問其師曰吾欲建選佛場以卓錫將何
歸答以遇徑則止行至此山下適有樵者在山問之
則以前湖為徑湖乃悟師昔所指授少頃又一素衣
老人前而致拜請師登山絕頂入五峰之間願捨此
地為師立錫之所第山有一大湫吾世家於此若
塞此必涸幸留一水穴我將時至以衛師言訖雲
霧晦冥風雨驟作及明既霽湫水盡涸惟一穴尚
存至今有龍井者在寺甬道之左其深無既傳言
井泉直通錢塘江語在禪家事類迨至宋高宗南
渡駐蹕於此乃勅賜徑山興聖萬壽禪寺其額乃駙
馬都尉沐聽所書志載樓閣幾至三千蓋肇建於唐
而尤顯於宋也隆慶二年歲在戊辰九月三日予往
登焉路隘且險至山麓迴首從右而望之則自浙以
西諸山俯伏逶迤空曠無際令人有塵芥六合之意
亦西浙一奇觀也頃之入寺僧有號梅谷者迎予入
坐館畢導予由寺西而上不數百步則有嚇石岩在
焉舊人題名尚存嚇石者或謂觀音化身與開山和
尚講法其詞頗誕和尚微致譏誚乃曰隨師指示祖
師和尚云此有頑石汝能嚇之使下乎乃大聲嚇之
其石隨而下復命嚇之使上石之隨而上者如前遂

裂爲三其字文像川知縣王某曾以絲線徹底經之
與石座無毫髮霑染即其所語法師上不着天下不
着地之明証也今地名有前嚇後嚇兒童婦女皆能
言之始知幻化之事殆以神通難以執一論也巖之
右有靈鷲塚高可三尺許凡師陞座講法鷄即佇立
不動傾耳聽之講畢隨衆以散所謂伯牙鼓琴而遊
魚出聽可以互照非妄傳也又有一白兔每冬夜時
來與師護膝若解人意者由西而北則松竹夾道陰
森可愛殊非塵境蓋青青翠竹總是法身鬱鬱黃花
無非般若者○又轉而西則有浴佛池池爲泥沙壅

淤止有金蓮花遍開拂水頃之步至寺門外則有碑
記者三中一石既大而巍然獨峙者即沐駙馬所書
寺額勒於石也碑之北向者乃唐進士某爲記予所
謂創於唐者稽諸此也又一碑低狹僅可三尺乃東
坡蘇老親書二游徑山詩曰來游曰再游曰重游也
雖苔蘚昏翳予以手模讀之尚可諷詠公之胸次飄
然霞舉亦可以想見於千百載之下矣再步至山麓
有地一方如砥予立而視之時適午後天陰雲霧蒸
蒸然起俯視諸山如群馬百萬蹀躞於煙霧中僅做
佛形似與初入山之景其變態又大異矣予語僧曰

此地立亭榭可以便觀眺僧云此宋望江亭也日久亭廢恨無再創之者予爲之憮然且堪輿家謂此山爲五峰攢秀蓋指鉢盂鵬搏晏坐大人朝陽也其名晏坐者昔黃巾賊入山中祖師坐於峰石賊疑其爲人也連以矢射之矢皆中石師則晏然不動故以名峰餘皆以形似名之且山僧備道是山典故歷歷如指掌亦可與言者然予讀廣記以此山爲天下第一名山舊人題額尚存而是山之奇止於立見西南諸山他若岩洞之奇絕泉壑之清勝較之鴈岩予所目覩者不啻霄壤即其高比天日尚減其十之四五又不知何由而得名也豈祖師肇創之神化如白兔靈鷄之現相其道獨異抑三千樓閣金碧輝煌梵宇緇宮凌架宇宙而故名之耶若在今日僅謂西浙名山可也予故因易其題額并即所見聞者記之

游五雲山記

慎蒙

武林多山而語山之極高者南北二峰爲最乃登高攬勝者之所必由也其北則初陽臺南則太虛樓又子胥廟前第一山西則六和塔蓋初陽臺自高臨下俯視西湖如帶扁舟一葉凡南之太虛樓雲峰庵雷峯塔皆在所畢照登太虛樓則北之大佛昭慶諸刹與

內外二湖明若匹練飛帆搖曳所謂天然圖畫者非
誣也登第一山則城南之萬家煙火鱗次櫛比江東
諸景如指諸掌登六和塔則江以西與南之蕭山俱
在一望又登攬之所誇以爲雄者萬曆甲戌秋客有
談五雲之勝者予乃由六橋至爭慈又由邵墳歷虎
跑至江口繞六和塔沿江而行江路既盡至一石牌
坊暫憩復進而北則有一石牌大書五雲二字自此
則路漸高山益深舍輿而徒矣復憩一亭內供小佛
一尊亭西向四圍山繞真如列障予題曰山列翠屏
又曲折蛇行遙見一亭隱然山隩若在霄漢視之則
伏虎亭也予南向而視則二山夾峙凡爲江之海門
與夫蕭山嚴州諸山及南北二高峰與吳山六和塔
皆可俯窺真如丘垤因題曰第一奇觀遂入法堂絕
無人聲若與塵世隔絕予題曰隔凡真境度之則已
在山極高處矣高明雄麗殊覺賞心前有二井覆以
亭欄名曰龍井井旁有一軒凡諸名公之題詠皆在
飯罷登僧樓借榻以卧如置身羲皇之上亦佛家所
謂歸歡喜地也夫是山也雄踞武林獨立雲表收拾
萬象於指顧眉睫之頃孔子所稱登東山而小魯信
哉

答起嵩論潮書

元 吳亨壽

至元十八年秋八月十有八日足下觀潮浙江亭明日書以遺予若致疑予逆流之水有可詰者朱子註騷謂潮以月加子午之時一日而再至則亦未嘗無說敢為足下誦所聞焉蓋坎本月之體月本水之精月與水一而已矣在天為月在地為水天有陰陽太少而月為太陰地有剛柔太少而水為太柔古人以方諸取水于月其氣類固相感也而况夫子午之位乃陰陽之始于其所始而月加焉則陰與陽感而陰以升陰與陰遇而陰以盛水陰類也當其所加之時湧而逆上從其類也月一晝夜凡一加午故潮一日再生月一日退天十三度十九分度之七故潮日遲于一日所以初三之潮晝遲而入十八之夜十八之潮夜遲而入初三之晝也一月之間生明生魄潮亦再盛焉生明之潮則自前月二十六長水謂之起信歷晦朔至月初三謂之大信初四潮勢漸殺謂之落信歷上弦至月十日謂之小信生魄之潮則自十一始長歷望至十八而盛自十九始殺歷下弦二十五而衰其起落大小之信亦如之天下之至信者莫如潮生落盛衰各有時刻故潮得以信言也月于一月

湧而逆上從其類也月一晝夜凡一加午故潮一日再生月一日退天十三度十九分度之七故潮日遲于一日所以初三之潮晝遲而入十八之夜十八之潮夜遲而入初三之晝也一月之間生明生魄潮亦再盛焉生明之潮則自前月二十六長水謂之起信歷晦朔至月初三謂之大信初四潮勢漸殺謂之落信歷上弦至月十日謂之小信生魄之潮則自十一始長歷望至十八而盛自十九始殺歷下弦二十五而衰其起落大小之信亦如之天下之至信者莫如潮生落盛衰各有時刻故潮得以信言也月于一月

之間漸遲而縮一日潮于兩信之內漸遲而縮兩潮
秋月最明秋潮最盛亦其理然也又嘗考之坎為月
魄離為月魂震生明也兌上弦也乾望卦也巽生魄
也艮下弦也坤晦卦也生明之盛非無故而盛也坤
一索而得長男故盛過兌少而往則衰矣生魄之盛
亦非無故而盛也乾一索而得長女故盛過艮少而
往則衰矣驗之于月參之于卦潮之理其殆幾乎
或曰誠如是則陽之盛莫如乾陰之盛莫如坤潮不
于是焉大而顧大于震明巽魄何耶曰茲又先天後
天之說也不本諸先天無以見造化之全體不參諸

後天無以見造化之妙用先天之卦體也乾坤離坎
位於四正震巽艮兌位於四維而月之周天實配之
後天之卦用也退軋于西北退坤于西南父母老而
不用而長男代父長女代母居東南生長之方天地
間萬物萬事咸于此乎權輿故其為氣也莫盛焉而
潮之大信實配之月配其體則陽為明陰為魄而軋
坤當望晦之位乃陰陽之極也潮配其用則長為盛
少為衰而震巽當大信之候乃陰陽之長也夫如是
則其不乾坤而震巽也有由矣或又曰亦何以知其
必取于卦耶曰以納甲家啓之納甲者如生明之月

昏出于庚震則納庚生魄之月晨見于辛巽則納辛之類是也陰陽者流用之率驗則月與卦相為用也審矣潮而有取于月也不亦有取于卦乎哉或又曰月之說然邪則潮之為候亦宜月半以前由微漸大月半以後由大漸微以象天三五而盈三五而虧可也今乃于明魄之生兩盛焉何哉曰明魄之盛固已如前所云然月一月一周天而一日之內則一加子一加午者也潮于月加子午之時一日再至故亦于月生明魄之日一月而再盛焉月之一潮之再若不相似而實相感召非深于理者未易以語此或又曰子所論浙江潮也他江亦有潮其遲速不同何與曰潮之生必生于月出之海浙江之去海為近故其至也如時他江所去有遠近故所至有遲速耳或又曰古今言潮者必推浙江亦謂銀山雪屋有頭數丈此為異爾他江之潮第如湧水復與此不同何與曰浙江去潮生處近掀天沃日之勢方盛而不可遏赭山龕山橫于江口頓然歛寬就窄其勢必至于衝激奔射也他江去潮生處遠遠則必殺故但湧水而已又何疑焉

游寶石山記

明都穆

名山記 卷之四 五十一
壬戌秋八月既望予至杭聞西湖之上有寶石山甚勝將以斯夕翫月其上故人周學諭與予自山之陰而登酌元學士黃晉卿讀書之軒俯瞰全湖一碧萬頃而吳山前據類屏障然其他若鳳凰南屏之山萬松慈雲之嶺又皆蜿蜒迴拱欲趨而先其東則錢塘之江瀰漫浩渺極目無際而西陵諸山出沒煙霏翠靄間誠天下之絕境也

黃龍洞記

在湖州弁山

慎蒙

萬曆二年歲三月自府城出北門至弁山行二里許至山麓極目而視則南之道場與東西諸山皆呈一

覽而萊畦麥隴環綠於平疇曠野之間殊為眙目繼而仰視則太湖諸石巍然獨隆乃洞石也至洞口則洞南一石卓立如人形而刻次東坡詩韻一首又一石北向偃僂而雄踞背刻黃龍洞三大書筆畫遒勁已沒其姓名矣自右繞而東皆巨石如人力壘成而皆有隙縫可通一線殆是天造洞之北有石壁方而且大高可數仞南一石畧加粘連其勢若欲飛墮者石上草木森然參差掩映不知何所托而生也石壁下一石聯屬橫生突出如今之增塑佛座下有門北向方而且整伺之不知其底俯視洞中令人心悸目眩

真爲不測其石之植立於洞內者稜角分明狀如鋸板又一石形圓似竹僅得其半若受斧鑿四週皆有階級可攀緣而下巉巖刻削奇麗異常曾有人緣組而下計二十五丈始至底底石皆五色成文南有一小洞洞口以泥封聽之有聲如吼驚惶而出俗傳有龍潛伏且通太湖名爲龍宮不誣也夫洞之深入而奇巧者往往有之此則直下而奇麗雖志所記載尤爲罕見真武殿復有小石壁高一丈有奇壁下小池名曰小龍潭及至絕頂坐問水亭則太湖之一碧萬頃可俯視不遠咫尺飛帆搖曳宛如一葉以及東西

心庭與夫小雷大雷縹緲七十二峰如在鏡中因與游客張蓋草坐命酒籍石袖拂烟霞喜鷺驚鴛悉出得俎之下興盡方返是日也偶以天朗氣清風浪恬靜得盡其勝如此且山下楊梅樹以數萬計青翠滿林不減閩之荔枝自是沃壤又亦奇觀也是洞爲山主而景之列於上下者適以增其美矣惜夫湖人皆知道場之爲最勝而不知弁之龍洞勝而且奇予故記之以闡其幽

大慈山虎跑泉銘

宋濂

虎跑泉在杭之大慈山廣福定慧禪院距城南十里

名山記 卷之四 五十九
而近唐元和十四年性空大師來游慈山樂其靈氣
鬱盤縛庵其中尋以無水將他之忽有神人言曰自
師之來我等繳惠者甚大柰何棄去南嶽童子泉當
遣二虎移來師無患也翼日果見二虎以爪跑山出
泉其列勝常大師因留止建立伽藍蘇文忠公守杭
日爲之賦詩有虎移泉眼趨行脚之句蓋紀實也

遊天目山記

伍餘福

天目山據東西兩澗之勝岩堯峭拔石勢峻嶒蜿蜒
蜿蜒橫亘八百餘里其分支衍派莫知紀極洞玄集
所謂二十四洞天者是也乃與安子出南門歷石虎

山山甚惡其狀如虎踞忽聞啼鶻聲輒有歸去來兮
之歎尋次沿干畧在午入亭而飯有錢煥卿在焉橋
圯不可渡僕夫攝衣前驅又次早谿谿與龍谿相望
其水勢湯湯發自天目相傳弘治間涿水無涯不循
龍谿故道衝啣及陸徙而溺者動以千計遂成兩谿
至今渡者甚難駕筏始得渡抵五山寺寺僧合掌道
左延入方丈少憩尋出山其山如五星分井排列目
前及渡口父老撻舟以待遂下馬散隊而行回視谿
水如沸問之或曰亦自天目來者也入孝豐縣令鄧
文憲卒吏相迎入公館安子先在坐謂曰吾待子久

矣次日始早行過西山菴菴僧煮茗茗之渡陳安踰
橫坎干涉崩谿次彭宅里有孤冢如堂封或曰是商
大夫老彭墓也伍子曰獨不見有所謂薤林者何也
惟旁有一碑仆且泐漫不可讀心許表其墓而未及
遂過鮑湖湖皆沙石水至則爲巨浸而八頁山正當
其衝去縣二十五里上有石洞可容數百人又有硃
砂洞多紅礫前代學堂縣址猶在焉蓋四山具瞻之
地也先是廣茗之變正恃此至待來嶺少駐日午始
抵荻浦寺寺多竒石類武康安子歎曰安得移置於
吾家乎遂出湯口而西轉茆山與安子蔭長林下下

有蒼松如虬極可愛更入金石鄉詢其故則曰黃金
石尚存山畔已而見之多薜荔纏繞擊之有聲琅琅
然又多黃色伍子據石而坐歎曰仙家點石爲金者
誣耶其上有白馬巖下有谿亦曰白馬互相掩映予
以其巖類馬首俯瞰深谿遂題曰白馬巖下谿而去
次獨山山有梁梁有碑將撫摩之弗果不數武轉入
章村村居多章姓者蓋宋章得象裔也有章大尹珪
者邀諸塗鄉人更請訪赤松子其洞豁以深幽以邃
中有潺湲聲水瀉如注石不工而屋乳不綴而旒或
叩之輒亦有聲側身處隘不可入僅小口空洞無涯

或以爲數年前有潛入不知所向者仙耶人耶較之
張果善權可相伯仲而此獨晦甚惜之爲題其洞曰
赤松劉諸石珪復入洞相邀延佇一小樓樓四面皆
松篁歲絃葱蔚而邨中編戶一覽殆盡輒具山肴以
款之止吾宿遂留其家焉秉燭夜飲相與談天目之
勝槩如指諸掌次早涉龍谿謁神龍祠長廊短楹皆
金碧貌龍爲人似有乘雲行雨之狀歷堦而觀有碑
記其事相厥地勢帝山坐鎮一方中有龍宮角則隆
鱗則叙類非他山所能及伍子歎曰青烏家所謂王
氣可以占天者其信然耶入方村村不過一二家及

河干村水村更覺牢落其獸蹄鳥跡縱橫道左心甚
恐又過寒村千絕無人煙疑其與塵寰相隔而天目
境界至是始分矣又次長潭其水色紺且黑噴石吞
沙勢若跳珠或謂龍母在焉蓋今之所謂徐仙姑者
是也仙姑亦人耳而孕爲龍其事亦不經者東入別
有一潭險不可涉遂止轉上大坎頭歷香坂路皆偪
仄遂舍車而徒且行且止安于顧我笑曰此豈蓬壺
境耶何愈峻愈奇而行者不知其勞也更上龜山次
茅嶺其下坂如削猿猱飲澗者接臂不絕旁有波羅
樹繫以白圍撫而盤桓進一步遂憇一小亭亭四面

皆屏障而風藏屏獨列其上儼然如畫衆皆又憇於
亭而余獨先之渡麻溪得觀印子石石如印纍纍可
玩下此則俯而復隆奇花異草馥郁何限其上有小
湖如練從空而落老僧引入山樓樓皆琅玕出煙入
雲變態叵測伍子曰是可以稅駕矣出而遍觀旋復
登樓猶未暮就寢夜半風戰雨颯颯有聲意其前之
行或阻夢寐中得詩二句曰分付山靈好相待莫教
風雨滯吾行迨曉始霽似山靈爲之洗塵者其泉益
駛山益媚爭流壘峙大倍於昨草光花氣動盪耳目
中有和尚田僅百畝自食其力初不知石壕吏之催

科也更入大墓塘塘轉而灣爲大洋爲中溪率多回
穴至是則益不得方軌與衆步行入污塘仰見駐節
廳有石如屋其玉壘金鏃猶在或以爲唐李靖討叛
丹陽屯軍於此是亦未可知也念四跳正當廳前嶙
峋砗磲斷崖峭壁迥出天表其下飛流瀾瀾洑洑嚙
石成淵疑有蛟龍出沒莫敢誰何相傳於潛每遇大
旱吸水而歸輒雨雨足乃止其石如瑪瑙如琥珀如
珠璣又或如浮磬有聲或如碣石有狀不可枚舉行
者每動色伍子取其怪而病其難少爲延佇俯視仰
扳高且深深如井底蛙跳踉而出始入翔鳳林其上

名山言 卷之四 三
有平原一千五百丈中有兩湖湖有魚或以爲龍散
子其中不可捕又有龍鬚草垂垂可愛相傳兩湖之
水東通蘇湖北漸安吉吾自安吉而逆沂之信有如
所傳者復過雷神宅時未雨不聞作嬰兒聲東上眉
峯岡岡去仙頂數十里野燒飛灰尚餘者金剛纂動
輒曳裾徐徐却立始得進從者皆有難色且日晡有
僧拉予歸安子曰登高者必忘食以是攘臂大呼衆
亦競進始履其巔皆奇石如鋸板片片重重斷而
復續直者如勁仆者如眠平者如鋪欹者如倚高者
如斗俯者如鞠合者如歸鸞離者如去鴈比者如弟

兄叙者如賓主其中有一峰獨聳焉上薄霄漢下眇
江河伍子據而坐東如臨安南如姑蘇西如宣城北
如吳興皆在目前其下金牛鳳凰回龍諸山悉如蟻
封而煙雲盡出其半乃噀安子告曰自東坡死後五
百年來未見有此樂者幸與子同躋天假良緣人酬
宿願是亦聖世之盛事不可無作輒賦云自是神龍
十二宮依然雙目與天通不知下界人多少都在山
靈雲雨中遂題曰仙丈峰勒石而退

評 讀此記乃由安吉州而入者有此景象若予
自餘杭入則其逕皆平易絕無可觀故復錄

此以見塗中一段光景後紀事皆同不贅

名山巖洞泉石古蹟卷之四

